

ELIE LÈBRE RACONTE L'HISTOIRE DE CUCURON

4° extrait

Elie Lèbre, agriculteur à Cucuron (1920-1991), a écrit et enregistré pour une émission radiophonique l'histoire de notre village. Il se réfère aux ouvrages qui ont été écrits sur le sujet, notamment « Cucuron » de Maurice Taron (Luberon Nature, 1979).

Vèrs 1540, Cucuron comptava mai de 3000 abitants e èra tròp a l'estrech dins sei premiers **barris**. Pereu en 1541 comencèron de nen bastir d'autres pèr enclausar lo mamelon dau Resquilhau, e ensin Cucuron s'espandissèt, tot en estènt totjorn **aparar** pèr de barris contra leis atacas deis uganauuds dei vilagis vesins. Aquela costrucien autorisada pèr lo rèi François I° durèt dos ans, e pèr **pagar** lei fres lei Cucuronencs donèron pendènt quauqueis ans lo vinten de totei lei **recòrdas**.

barri : rempart

aparar : protéger

pagar : payer

recòrda : récolte

Dau tèmps dei guèrras de religien Cucuron servissié de basa ai tropas catolicas que **corsejavon** e massacravon lei Vaudés de la valèia d'Aiga, de Lormarin e de Merindòu. En 1562, lei sordats massacrèron davant lei muralhas de Cucuron una tropa d'enfants e de fremas uganauuds qu'avien fugit de Sisteron quora aquela vila siguèt pressa pèr lei catoliques.

corsejar : poursuivre

En 1675, lo novèu senhor voguèt restabli sei privilègis que sei predecessors avien laissat pèdre. Mai lei Cucuronencs se laissèron pas faire e lo senhor abandonèt sei drechs, contra lo pagament d'una renta anual de 1100 livras. En 1720, la pèsta ravagèt Cucuron trege mes de tèmps, mai de 900 abitants siguèron tuats pèr la malautié. Lo vilagi s'es jamai remés d'aquela pèrta de populacien.

Pauc de tèmps avant la Revolucien, la senhorié èra venguda pèr eiretagi a la familha d'Ancezuna, puei au marqués de Valbèla, que siguèt lo darnier senhor de Cucuron avans la Revolucien.

